

DOMENIE XIII «VIE PAL AN»

Jutoris pe Liturgjie

Domenie, ai 30 di Jugn dal 2019

Si podarès dî che lis leturis di cheste domenie a tratin des esigjencis de vocazion; chê vocazion che une volte si riferive ai predis, fraris e muiniis e che e veve di fâ i conts, plui che cul Signôr, cu lis regulis di fier de istituzion glesiastiche.

Chest vanzeli però nol è fat dome pai predis e pes muiniis, ma par ducj i cristians, i batiâts, oms e feminis. Metût come fonde il popul di Diu e il sacrament dal Batisim, in ogni comunitât ognun /ognune a àn une vocazion, come che nus spieghe ben S. Pauli: A ognidun i je dade la manifestazion dal Spirt pal ben di ducj: un al à vude peraule di sapience; un altri peraule di sience; un al à vude la fede; un altri il don di vuarî; un la virtût dai miracui; un altri il don de profezie; un altri ancjemò il diserniment dai spirts; un altri la diversità des lenghis; un altri ancjemò la interpretazion des lenghis. Ma dutis chestis robis al è simpri chel stes identic Spirt che lis fâs, dividintlis a ognidun come che al vûl lui.

Cjalant a lis comunitâts racomandadis di S. Pauli, si spere che il sinodi de Amazonie dal Otubar prossim al lassi rivâ une soflade di Spirtu Sant e une svintade di aiar fresc ancje pai dons, servizis, ativitâts di ogni om / ogni femine des nestris comunitâts (Cf.1 Cor 12, 7-11. 4-6).

Intant però scoltìn lis leturis di vuê, stin dongje ancje a dutis chês personis che, batiadis o no, a sintin vêr e valit il mes di Gjesù e rifletìn su ce che il Mestri nus propon e domande.

Antifone di jentrade

Sal 46,2

Batêt lis mans, popui de tiere,
scriulant al Signôr in ligrie.

Colete

Diu, che midiant de tô gracie
tu âs volût ch'ò diventassin fîs de lûs,
danus par plasê di no jessi invuluçâts dal scûr de falsetât
ma di restâ simpri lusorôs cul sflandôr de veretât.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

1 Re 19,16.19-21

Liseo si cjapà sù e i le daûrji a Elie.

In Liseo che si cjapà sù e i le daûrji a Elie no je dome une decision umane, ma un don, un Spirt dal alt rapresentât dal fat che Elie al passà dongje di lui e i butà intor la sô manteline.

In chest episodi, o cjatin: une sielte radicâl, une decision clare, un prin e un dopo cence ripensaments, parcè che al dîs il vanzeli di vuê: Chel ch'al met man a la vuarzine e po si volte indaûr, nol è fat pal ream di Diu.

Un esempi di tâls decisions lu cjatìn tai nestrìs missionaris di une volte: lôr a partivin des borgadis puaris dal Friûl par lâ a puartâ la buine gnove dal vanzeli in paîs ancjemo plui misars e a metevin in cont di no tornâ indaûr.

Dal prin libri dai Rês

In chei dîs, il Signôr i disè a Elie: «Tu onzarâs Liseo, fi di Safat, di Abêl-Mecole, come profete impen di te.

Elie al partì di li e si intivà in Liseo, fi di Safat, ch'al stave arant cun dodis pârs di bûs e lui al jere daprûf dal dodicesim. Elie al passà dongje di lui e i butà intor la sô manteline. Liseo al implantà i bûs, i corè daûrji a Elie e i disè: «Lassimi dâur une bussade a gno pari e a mê mari e po dopo o vignarai daûrti». Elie i rispuidè: «Va e torne; tu sâs benon ce che o ai fat di te». Liseo lu lassà, al cjapà un pâr di bûs e ju sacrificà. Al doprà i lôr furniments par fâju rustî e ju esibì ai siei oms, che ju mangjarin. Daspò si cjapà sù e i le daûrji a Elie sicu so famei.

Peraule di Diu.

SALM RESPONSORIÂL

dal Salm 15

A chel che al mole dut pal Signôr no i reste che il Signôr. Al è duncje vêr il ritornel dal salm: Tu sês tu, Signôr, l'unic ben ch'o ai.

Il salmist al conte de sô fiducie in Diu diventât ormai par lui ben, ereditât, cjaliç e destin. In companie dal Signôr e vignarà la sapience e soledut: Tu mi fasarâs cognossi il troi de vite.

R. Tu sês tu, Signôr, l'unic ben ch'o ai.

Ten cont di me, Diu, parcè che li di te mi pari.

I ai dit al Signôr: «Tu sês tu il gno Signôr,
parsore di te nissun altri ben no 'nd ai».

Signôr, part de mê ereditât e gno cjaliç,
tes tôs mans il gno distin tu strenzis. **R.**

O benedissarai il Signôr che mi à dade sapience,
ancje vie pe gnot il gno cûr mi inscuele.

Il Signôr al è simpri denant dai miei vôi;
se si met a la mê gjestre, no cloparai. **R.**

Par chel il gno cûr al è content e al gjolt dentri vie,
parfin la mê cjar e polse sigure.

Parcè che no tu i darâs a lis inferis la mê anime,
no tu lassarâs che il to amì al ledi a finîle te tombe. **R.**

Tu mi fasarâs cognossi il troi de vite:

denant di te gjonde fin parsore il cjâf,
ligrie cence fin a la tô gjestre. **R.**

SECONDE LETURE

Ga 5,1.13-18

O sês stâts clamâts a la libertât.

Tal clime di vuê il massim dai bens personâi e je la mê libertât segnade dal: "O fâs ce che mi plâs". Ancje S. Pauli al dîs: o sês stâts clamâts a la libertât dome che al pon dôs condizions: viodêt di jessi simpri ognidun famei di chel altri e tu amarâs il to prossim come te in persone. Al è tun tâl teren che e madure la vere libertât umane e cristiane.

L'Apuestul al continue cuntune racomandazion: cjaminait cu la virtût dal Spirt, chel Spirt che si è manifestât tal mût di vivi di Gjesù.

De letare di san Pauli apuestul ai Galazians

Fradis, Crist nus à sfrancjâts pe libertât: tignît dûr alore e no stait a lassâsi tornâ a meti sot dal jôf de sotanance.

Vualtris duncje, fradis, o sês stâts clamâts a la libertât. Dome che no vês di doprâ la libertât come un rimpin par vivi seont la cjar; invece midiant dal amôr viodêt di jessi simpri ognidun famei di chel altri. Parcè che la leç e à la colme intune peraule sole, ven a stâi: “Tu amarâs il to prossim come te in persone”. Se dopo si muardês e si glotês un cul altri, cirît almancul di no fiscâsi fra di vualtris!

Par chel us dîs: cjaminait cu la virtût dal Spirt e alore no larês daûr des vois de cjar. Di fat la cjar e à vois contrariis a chês dal Spirt, come che il Spirt lis à contrariis a chês de cjar. Di fat chestis dôs robis a son juste une cuintri di chês altre, di mût che vualtris no fasês plui ce ch’o volaressis.

Ma se o sês sburtâts dal Spirt, no sês plui sot de leç.

Peraule di Diu.

CJANT AL VANZELI

cf. Zn 8,12

R. Aleluia, aleluia.

Jo o soi la lûs dal mont, al dîs il Signôr,
chel ch’al ven daûr di me al varà la lûs de vite.

R. Aleluia.

VANZELI

Lc 9,51-62

Si invià rissolût viers di Gjerusalem. Ti vignarai daûr pardut là che tu larâs.

Prime di dut, come simpri, o vin di cjalâ a la persone di Gjesù; lui al à za metût in pratiche ce che vuê al sta domandant ai siei dissepui. Di fat si invià rissolût viers di Gjerusalem savint che al varès fate une brute fin.

Lui al è pazient, bon e tolerant cui siei nemîs; di fat si inviarin par un altri borc.

Molade la cjase di Nazaret e il lavôr, nol à dulà poiâ il cjâf, al sfadie pal avent dal Ream di Diu e no si volte indaûr te prospietive de persecuzion e di une muart violente.

Se i tignîn a jessi dissepui di Gjesù, o varin ancje di lassâsi iluminâ dal esempi di Liseo e dai fats di chest vanzeli.

Dal vanzeli seont Luche

Biel ch’al stave par colmâsi il timp ch’al sarès stât puartât vie dal mont, Gjesù si invià rissolût viers di Gjerusalem e al mandà un pôcs di mes denant di se. Chei a partirin e a jentrarin tun borc di samaritans, par prontâi ce che i coventave. Ma lôr no i faserin un bon acet parcè che al stave lant viers Gjerusalem. Viodint une tâl, i dissepui Jacum e Zuan i diserin a Gjesù: «Signôr, vuelistu ch’o disin ch’al vegni jù il fûc dal cîl a parâju in cinise?». Ma Gjesù si voltà viers di lôr e ur cridà. Po si inviarin par un altri borc.

Biel cjaminant, un i disè a Gjesù: «Ti vignarai daûr pardut là che tu larâs». Ma Gjesù i rispuindè: «Lis bolps a an une tane e i ucei a an un nît, ma il Fi dal om nol à dulà poiâ il cjâf».

Po i disè a di un altri: «Ven daûr di me!». Ma chel i rispuindè: «Signôr, lassimi prime lâ a soterâ gno pari». Gjesù i rispuindè: «Lasse che i muarts a soterin i lôr muarts; tu va a predicjâ il ream di Diu».

Un altri i disè: «Signôr, o vignarai daûrti; prime però lassimi lâ a saludâ i miei di cjase». I rispuindè Gjesù: «Chel ch’al met man a la vuarzine e po si volte indaûr, nol è fat pal ream di Diu».

Peraule dal Signôr.

Su lis ufiertis

Diu, che tu operis cun fuarce intai tiei misteris,
fâs, par plasê,
che la nestre devozion e sedi simpri degne dai tiei sants regâi.
Par Crist nestri Signôr.

Antifone a la comunion

Sal 102,1

Benedis, anime mê, il Signôr:
dut ce ch'al è in me il so non sant al benedissi.

Daspò de comunion

Cheste vitime divine ufierte e ricevude
che nus fasi vivi, Signôr,
par che, saldâts daprûf di te cuntun amôr che nol cognòs polse,
o podedin produci un ben ch'al dure par simpri.
Par Crist nestri Signôr.

* * *

Cjants

Libri Hosanna, sot il titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

***La nestre societât no i perdone a la glesie catoliche un pecjât: la dople muse, falsetât, ipocrisie, ,
il pratindi de int ce che no met in pratiche jê te sô strutture clericâl.***

***Par noaltris catolics e vâl in mût dal dut particolâr la colete de messe di vuê, la domande di
perdon e la gracie di mendasi, almancul di cumò indenant.***

Diu, che midiant de tô gracie
tu âs volût ch'o diventassin fîs de lûs,
danus par plasê di no jessi invuluçâts dal scûr de falsetât
ma di restâ simpri lusorôs cul sflandôr de veretât
(*almancul di cumò indenant*).
Par Crist nestri Signôr.
Amen.

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal
popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Libri di riflessions sul Vanzeli di pre Antoni Beline: Vanzeli par un popul, an C, Ed. La Nuova Base.*

* *Par domandâ chescj libris scrivêt a info@glesiefurlane.org*

